

Mensahe 3

Ang Duha ka Kadaotan sa Katawhan sa Dios ug ang Pagkamatimuman sa Dios sa Pagtuman sa Iyang Pamatigayon

Basahong Kasulatan: Jer. 2:13; Sal. 36:8-9;
Juan 4:10, 14; 7:37-39; 1 Cor. 10:4; 12:13

- I. Ang Jeremias, nga basahon nga puno sa pagpamulong kalabot sa sala sa Israel ug sa kapungot, pagpanton, ug pagsilot sa Dios, nagpadayag nga ang tuyo sa Dios sa Iyang pamatigayon pagkahimo mang tuboran, tinubdan, sa buhing mga tubig aron ipaambit ang Iyang Kaugalingon ngadto sa pinili Niyang katawhan aron matagbaw ug makapahimulos sila sa tuyo nga mapalugwa ang iglesia, ang kapikas sa Dios, nga pagtubo sa Dios, pagdako sa Dios, aron mahimong kahupnganan sa Dios nga magpadayag Niya; ang unod sa diosnong pinadayag mao nga gilalang ug gitubos ta sa Dios sa tuyo nga iumol ang Iyang Kaugalingon kanato aron maatong kinabuhi ug tanan—2:13; Sal. 36:8-9; Juan 3:29-30; 4:10, 14; 7:37-39; Bug. 7:17; Efe. 3:16-19:**
- A. Si Cristo nga buhi, espirituhanong bato, gihampak sa pagbulot-an sa kasugoan sa Dios aron moagay ang tubig sa kinabuhi diha sa pagkabanhaw gikan Niya ug ngadto sa tinubos Niyang katawhan aron mainom nila—Exo. 17:6; 1 Cor. 10:4.
 - B. Ang pag-inom nato sa usa ka Espiritu diha sa pagkabanhaw naghimo natong mga bahin sa Lawas, nagtukod nato nga Lawas, ug nag-andam nato nga mapangasawonon ni Cristo—12:13; Bug. 22:17.
- II. “Nakahimog duha ka kadaotan ang Akong katawhan: / Gisalikway Ko nila, / Ang tuboran sa buhing mga tubig, / Aron magkalot alang sa ilang kaugalingon og mga pundohanan, / Mga pundohanan nga niliki, / Nga dili kasudlag tubig”—Jer. 2:13:**
- A. Niinom gyod unta ang Israel sa Dios nga tuboran sa buhing mga tubig aron mahimo silang pagtubo Niya nga pagpadayag Niya, apan naghimo hinuon silag duha ka kadaotan:
 - 1. Gisalikway nila ang Dios nga ilang tuboran, ilang tinubdan, ug nangadto sila sa tinubdan nga dili ang Dios; kining duha ka kadaotan ang nagdumala sa tibuok basahon ni Jeremias.
 - 2. Ang pagkalot og mga pundohanan naghulagway sa paghago sa Israel sa tawhanong pagpangabudlay nila aron maghimog mga butang (mga diosdios) nga ipuli sa Dios.
 - 3. Kanang niliki ang mga pundohanan ug dili kasudlag tubig nagpakita nga kon dili ikapaambit kanato ang Dios mismo ingon nga buhing tubig, walay makatagbaw sa atong kauhaw ug makahimo natong pagtubo sa Dios nga magpadayag Niya—Juan 4:13-14.
 - B. Sa panan-aw sa Dios, ang daotan, ang tighimog daotan, mao kadtong dili moduol aron moinom Niya (Isa. 55:7); ang daotang kahimtang sa mga daotan mao nga dili sila moduol sa Ginoo aron mokaon, moinom, ug mopahimulos sa Ginoo; nagbuhat silag daghang butang, apan dili sila moduol aron mokontak sa Ginoo, modawat

Mensahe 3 (sumpay)

Niya, motilaw Niya, ug mopahimulos Niya; sa panan-aw sa Dios, walay labaw ka-daotan kay niini (57:20-21; itandi sa 55:1-2).

- C. Tuyo sa Dios nga ipaambit ang Iyang Kaugalingon sa tawo isip katagbawan sa tawo aron modako Siya, apan nahimong dili matinumanon ug dili putli ang tawo ug gisalikway niya ang Dios tungod sa mga diosdios:
1. Ang diosdios sa atong kasingkasing (Ezeq. 14:3) kana mang bisan unsang butang nga naa sa sulod nato nga gihigugma ug gimahal nato labaw sa Ginoo ug nakapuli sa Ginoo sa atong kinabuhi (1 Juan 5:21):
 - a. Kadtong nagpahimutang og mga diodios sa ilang kasingkasing nahimulang sa Ginoo tungod sa ilang mga diosdios (Ezeq. 14:5).
 - b. Dili makakaplag sa Dios ang tanang dunay mga diosdios sa sulod nila apan dayag nga nagtinguha sa Dios (v. 3; itandi sa Jer. 29:13).
 2. Tungod sa pagsimbag mga diosdios, gihimo sa Israel ang ilang kaugalingon nga kawang, balewala; daghan kaayo silag diosdios nga ang gidaghanon niini sama sa gidaghanon sa ilang mga syudad (2:5, 28; 11:13); giilisan sa Israel ang realidad sa ilang Dios, ang ilang himaya, sa kakawangan sa mga diosdios (2:11; Sal. 106:20; Rom. 1:23).
 3. Ang apostasiya may kalabotan sa pagbiya sa dalan sa Dios ug paglakaw sa laing dalan aron mosunod sa mga butang nga dili ang Dios; pagsalikway kini sa Dios ug pag-adto sa mga diosdios—Jer. 2:19.
 4. Sa dihang gibihag ang Israel sa mga taga-Babilonia, dili gihapon biyaan sa katawhan sa Dios ang ilang mga diosdios ug gidaladala kini gikan sa maayong yuta ngadto sa Babilonia; bisan unsang mopuli sa Dios o mookupar ba sa posisyon sa Dios diosdios man nga mahimong kabug-at sa magsisimba—Isa. 46:1.
 5. Ang amang o walay tingog nga mga diosdios (1 Cor. 12:2; Hab. 2:18-20) naghimo sab sa mga magsisimba niini nga amang ug walay tingog, apan himoon sa buhing Dios nga mamulong diha sa Iyang Espiritu ang mga magsisimba Niya (1 Cor. 12:3b; Sal. 115:4-8; 2 Cor. 4:13; Sal. 116:12-13):
 - a. Walay magsisimba sa Dios nga maghilom; gamiton gyod sa tanan ang ilang tingog sa pagpamulong og “Si Jesus Ginoo!” diha sa Espiritu sa Dios.
 - b. Kining pagpamulong og “si Jesus Ginoo” maoy kinadak-ang kagamitan sa tanang espirituhanong gasa; ang pagtawag nato sa ngalan sa Ginoo nga dunay hustong espiritu maoy paagi nga makaambit, makapahimulos, ug makasinati ta sa Espiritu Santo—1 Cor. 12:3b; itandi sa Rom. 14:17.
 - c. “Dili magdayeg ni Jehova ang mga minatay, / O ang nanganaog ba sa kahilom. / Apan magdayeg mi ni Jehova / Sukad karon ug hangtod sa eternidad. / Hallelujah”—Sal. 115:17-18.
 6. Posible mang mahimong diosdios ang bisan unsang nabatongan nato ug bisan ngani ang tanang pagkamao nato; daotan ug wala magmatinumanon ang Israel sa Dios sa pagsalikway nila Niya tungod sa mga diosdios; kalabot sa pagkadili-matinumanon nato sa Dios, pareho ra ta sa Israel.

III. Kinahanglan makita nato ang pagkamatinumanon sa Dios sa pagtuman Niya sa Iyang pamatigayon—itandi sa 37:3:

- A. Bisan dili ta matinumanon, matinumanon ang Dios (Lam. 3:23b); niingon ang koro sa inilang alawiton (*Mga Alawiton*, #19) nga, “Matinumanon Ka! Matinumanon Ka!

Mensahe 3 (sumpay)

/ Matag buntag bag-ong kaluoy Mo; / Naghatag Ka sa tanang kinahanglan, / Pagkamatinumanon Mo gayod!":

1. Sabton tingali nato ang giingon sa Biblia ug ang giingon ning alawitona bahin sa pagkamatinumanon sa Dios sa natural o sa espirituhanon bang pagsabot.
 2. Kon natural ang pagsabot nato sa pagkamatinumanon sa Dios, maghunahuna tingali ta nga matinumanon Siya labi na gyod sa materyal nga mga sangkap o pisikal nga mga panalangin, apan dili man segun sa natural nga pagsabot nato ang pagkamatinumanon sa Dios; niingon ang 1 Corinto 1:9 nga matinumanon ang Dios sa pagtawag kanato ngadto sa pakig-ambitay sa Iyang Anak, apan sa natural nga pagsabot nato dili tingali Siya matinumanon sa pagtagad sa atong kaayohan.
 3. "Hunahunaa ang mga pag-antos ni apostol Pablo. Gitawag, gitahasan, giluwanan, ug gipadala siya sa Dios, apan bisan asa siya niadto, nagkaproblema siya. Sama pananglit, sa pagsugod gyod niyag sangyaw ni Cristo, gilutos dayon siya. Kinahanglan man ngani siyang mokalagiw gikan sa Damasco nga itunton agi sa paril sulod sa bukag. Nagpasabot ba kini nga dili matinumanon ang Dios kang Pablo? Dili, nagpasabot kini nga dili sumala sa natural nga pagsabot nato ang pagkamatinumanon sa Dios" (*Life-study of Jeremiah*, p. 28)—Buh. 9:15-16, 23-25; 2 Cor. 11:30-33; Col. 1:24; 2 Cor. 1:5; Fil. 3:10; Bug. 1:9; 2 Tim. 2:10; 3:12.
 4. Sa pagtuo nato ni Ginoong Jesus, naglaom tingali ta nga magmalinawon ug mapanalanginan, apan daghan hinuon tingali tag problema, ug nawad-an tingali ta sa atong kasegurohan, kahimsog, o katigayonan ba; dunay mga Cristohanon nga kon makasinati nianang mga butanga, magduda tingali sa pagkamatinumanon sa Dios ug mangutana nganong wala Niya ilikay kanila ang mga kalisdanang nahitabo nila—Buh. 14:22; 1 Tes. 3:2-5.
 5. Makaamgo gyod unta ta nga sa pagtugot sa Dios nga magkaproblema ta, matinumanon Siya sa Iyang tuyo nga pabiyaon ta sa mga diosdios ug dad-og balik sa Iyang Kaugalingon; mahimo tingaling mga diosdios nato ang atong kalinaw, kahilwasan, kahimsog, ug katigayonan, ug matinumanon ang Dios sa pagkuha ning mga butanga aron moinom ta Niya nga tuboran sa buhing mga tubig.
 6. Sama pananglit, kon mahimong mga diosdios nato ang atong balay o katigayonan ba, moinom ta niini ug dili sa Dios; may kalabotan sa pagkuha ning mga diosdiosa ug pagpainom nato Kaniya ang pagkamatinumanon sa Dios—Sal. 38:8.
 7. Matinumanon ang Dios sa pagdala kanato ngadto sa Iyang pamatigayon (1 Cor. 1:9; 1 Tes. 5:23-24), ug ang Iyang pamatigayon pag-inom man nato ni Cristo, pagkaon ni Cristo, pagpahimulos ni Cristo, pagsuyop ni Cristo, ug paghilis-sagol ni Cristo aron mabatonan sa Dios ang Iyang pagtubo diha nato para matuman ang Iyang pamatigayon.
 8. Makita gyod unta nato nga dili ta mas maayo sa Israel; posibleng mahimong diosdios nato ang bisan unsang butang, apan matinumanon ang Dios sa pagtuman sa Iyang pamatigayon; sa pagkamatinumanon Niya kuhaon Niya ang atong mga diosdios aron moinom ta Niya; moinom gyod tang tanan sa Dios nga tuboran sa buhing mga tubig, dawaton si Cristo nganhi nato ug ihilis-sagol Siya aron motubo Siya ug matuman ang pamatigayon sa Dios nga mapadayag Siya pinaagi nato nga kapikas Niya—Juan 3:29-30.
- B. Kon nakaamgo ta nga wala ta magmatinumanon sa Dios, maghinulsol ug mohilak tingali ta, apan mosugod gyod dayon tag inom sa buhing mga tubig, magdayeg sa

Mensahe 3 (sumpay)

Dios, magpasalamat Niya sa tanang butang, ug magpahimulos Niya (1 Tes. 5:16-18); kini ang gusto sa Dios; wala maikag ang Dios sa bisan unsa kondili sa pagpahimulos ra nato ni Cristo:

1. Maghunahuna tingali ta nga tungod sa atong kapakyasan, wala na tay paglaom; gibati gyod tingali sa katawhan sa Israel nga gisalikway na sila sa Dios ug nga natapos na sila, apan dili mapakyas ang mga puangod sa Dios; bag-o hinuon kini matag buntag—Lam. 3:22-23.
2. Makapahayag man ngani si Jeremias nga si Jehova ang iyang pahat ug nilaom siya Niya, kay maayo Siya sa mga naghulat Niya; dunay paglaom diha sa Dios kay diha sa Dios wala may kahigawad—vv. 24-25; itandi sa Sal. 16:5; 73:25-26.
3. Ang kapakyasan nato maghatag mag higayon nga makaanhi si Cristo aron mahimong pagkamatarong ug pagtubos nato ug ipaambit sab ang Iyang Kaugalingon kanato aron mahimong atong kinabuhi ug balaod sa kinabuhi nga dunay kahimoan nga makaila sa Dios ug magkinabuhi sa Dios; sa ato pa, nag-andam ug naghatag lag higayon ang kapakyasan nato nga makaanhi si Cristo aron matuboy Siya diha nato ug pinaagi nato aron mahimong atong sentro ug paglukop—Jer. 23:5-6; 31:33-34; Col. 1:17b, 18b.
4. Kon dili ta magmatinumanon sa Dios karong adlaw, dili ta angay mahigawad; dunay paagi ang Dios sa pagtagad kanato ug pahamtongon ta ug mahimong Bag-ong Jerusalem, ingon ba nga madaogong pangasaw-onon Niya sa sunod nga panahon o asawa Niya sa eternidad—Heb. 6:1a.
5. Dili ta angay mabalaka sa atong sitwasyon; mapailobon, masimpatiyahon, ug mapuangoron ang Dios, ug mogugol Siyang panahon sa pagpahamtong kanato:
 - a. Ang tanang magtutuo, maluyahon ba o kusganon karong panahona, mahimo mang bahing inug-umol sa Bag-ong Jerusalem, ug hamtong na ang tanang naa didto—Bug. 19:7-9; 21:2.
 - b. Busa, dili gyod ta maluya o mahigawad ba; magpadasig ug magpalipay hinuon ta sa Dios sa tanang paglipay ug pagdasig—2 Cor. 1:3-4; Rom. 15:5.
 - c. Kita gyod unta ang tinuod nga mga magsisimba sa Dios, nga tuboran sa buhing mga tubig, sa pag-inom nato Kaniya aron mahimo Siyang realidad sa sulod nato, nga sa kapulihay mahimong pagkatinuod ug pagkamatinud-anon nato nga niini mosimba ta sa Dios sa pagsimbang gitinguha Niya—Juan 4:23-24.